

**АЖИЛ, ҮЙЛЧИЛГЭЭГ ХАРИУЦУУЛАН ГҮЙЦЭТГҮҮЛЭХ ГЭРЭЭ**

20<sup>16</sup> оны <sup>16</sup> дугаар сарын <sup>20</sup>-ны өдөр

Дугаар 92

Улаанбаатар хот

Монгол Улсын Зам, тээврийн хөгжлийн сайдын "Гэрээгээр гүйцэтгүүлэх ажил, үйлчилгээний жагсаалт батлах тухай" 2016 оны 76 дугаар тушаалыг үндэслэн нэг талаас Зам, тээврийн хөгжлийн яамыг төлөөлөн тус яамны Төрийн нарийн бичгийн дарга Ж.Бат-Эрдэнэ (цаашид "яам" гэх), нөгөө талаас "Автотээврийн Үндэсний Төв" төрийн өмчит үйлдвэрийн газрыг төлөөлөн тус төвийн захирал П.Дэлгэрнаран (цаашид "төв" гэх) нар дор дурдсан нөхцөлөөр харилцан тохиролцож, энэхүү гэрээг байгуулав.

**Нэг. Нийтлэг үндэслэл**


1.1. Энэхүү гэрээний зорилго нь Захиргааны ерөнхий хуулийн 52 дугаар зүйлийн 52.1 дэх хэсэг, Монгол Улсын Засгийн газрын тухай хуулийн 20 дугаар зүйлийн 5 дахь хэсгийн 11-д заасан Зам, тээврийн хөгжлийн сайдын эрхлэх асуудал болон Автотээврийн тухай хуулийн 6 дугаар зүйлд заасан автотээврийн асуудал эрхэлсэн төрийн захиргааны төв байгууллагын бүрэн эрхээс зарим чиг үүргийг "Автотээврийн Үндэсний Төв" төрийн өмчит үйлдвэрийн газраар гэрээний үндсэн дээр шилжүүлэн гүйцэтгүүлэх, түүний хэрэгжилтэд шууд хяналт тавьж ажиллахад оршино.

1.2. Энэхүү гэрээг 20<sup>16</sup> оны <sup>12</sup> дүгээр сарын <sup>20</sup>-ний өдрөөс 20<sup>17</sup> оны <sup>12</sup> дугаар сарын <sup>20</sup>-ний өдрийг хүртэл хугацаагаар байгуулав.

1.3. Талууд автотээврийн асуудал эрхэлсэн Засгийн газрын гишүүний хуулиар олгогдсон бүрэн эрхийг харилцан хүндэтгэх замаар хамтын ажиллагааг хэрэгжүүлнэ.

**Хоёр. Гэрээгээр гүйцэтгүүлэх ажил, үйлчилгээний чиглэл**

2.1. Монгол Улсын Зам, тээврийн хөгжлийн сайдын 2016 оны 76 дугаар тушаалын 1 дүгээр хавсралтад заасан ажил, үйлчилгээг энэхүү гэрээний үндсэн дээр эрхлэн гүйцэтгэнэ.



### Гурав. Яамны хүлээх үүрэг, эрх

3.1. Яам нь дараах үүрэг, эрхтэй:

3.1.1. Автотээврийн салбарын хууль тогтоомж, Монгол Улсын Засгийн газрын 2016-2020 оны үйл ажиллагааны хөтөлбөр, Монгол Улсын эдийн засаг, нийгмийг хөгжүүлэх үндсэн чиглэлд автотээврийн чиглэлээр тусгагдсан бодлого, зорилтот арга хэмжээ болон хуулиар олгогдсон Сайдын эрхлэх асуудлын хүрээний зорилт, чиг үүргийг хэрэгжүүлэхэд чиглэсэн үйл ажиллагааг бодлогын удирдамжаар хангаж, мэргэжил арга зүйн болон цаг үеийн шуурхай зөвлөгөө, дэмжлэг үзүүлэх;

3.1.2. Энэхүү гэрээний 3.1.1-д заасан бодлого, чиг үүрэг, зорилтот арга хэмжээг зохион байгуулахдаа Зам, тээврийн хөгжлийн Сайдтай бүтээгдэхүүн нийлүүлэх гэрээ байгуулж, яамны үйл ажиллагааны төлөвлөгөөтэй уялдсан "төв"-ийн үйл ажиллагааны төлөвлөгөөг баталж, хэрэгжилтэд хяналт тавьж ажиллах;

3.1.3. Эдийн засаг, нийгмийн хөгжлийн өсөлтийг хангахуйц автотээврийн салбарыг хөгжүүлэх бодлого, төлөвлөгөө, төсөл, хөтөлбөр боловсруулж, бодлогын удирдамжаар хангаж ажиллах;

3.1.4. Автотээврийн салбарын эрх зүйн орчинг боловсронгуй болгож, хууль тогтоомжийн хэрэгжилтийг хангуулах;

3.1.5. Гэрээний үндсэн дээр хариуцуулан гүйцэтгүүлэх ажил, үйлчилгээг зохион байгуулах зөвлөмжийг батлах, гүйцэтгэлд нь хяналт тавих;

3.1.6. Эрхлэх асуудлын хүрээнд тусгагдсан зорилт, арга хэмжээний хэрэгжилтийн байдалд хяналт, шинжилгээ хийх, үр дүнг тооцож, хэрэгжилтийн байдлыг тодорхой шалгуураар тодорхойлж, үнэлэх;

3.1.7. Улс, хот хоорондын болон аймаг, орон нутгийн ачаа, зорчигч, жуулчин, шуудан тээвэрлэлт, тээврийн хэрэгслийн техникийн хяналтын үзлэг, бүртгэл, мэргэшсэн жолоочийн статистик мэдээлэл болон тээвэрлэлтийн ажил, үйлчилгээний орлого, зардлыг багтаасан санхүүгийн тайлан балансын мэдээллийг төвөөс шаардан гаргуулах;

3.1.8. Энэхүү гэрээний үүргийн биелэлтэд шууд хяналт тавих;


3.1.9. Энэхүү гэрээг биелүүлээгүй эсхүл удаа дараа хангалтгүй биелүүлсэн тохиолдолд яам гэрээг дангаар цуцална.

### Дөрөв. Төвийн хүлээх үүрэг, эрх

4.1. "Төв" нь дараах үүрэг, эрхтэй:

4.1.1. Монгол Улсын холбогдох хууль, тогтоомж, дүрэм, журам, стандарт болон салбарын яамнаас гаргасан тушаал, шийдвэрийн хэрэгжилтийг хангах;

4.1.2. Автотээврийн салбарын хууль тогтоомж, Монгол Улсын Засгийн газрын 2016-2020 оны үйл ажиллагааны хөтөлбөр, Монгол Улсын эдийн засаг, нийгмийг хөгжүүлэх үндсэн чиглэлд автотээврийн чиглэлээр тусгагдсан бодлого, зорилтот арга хэмжээ болон Сайдын эрхлэх асуудлын хүрээний зорилт, чиг



С.

үүргийг хэрэгжүүлэхэд чиглэсэн үйл ажиллагаанд удирдлага, зохицуулалтаар хангах, бүх талын дэмжлэг туслалцаа үзүүлэх;

4.1.3. Энэхүү гэрээний 4.1.2-д заасан бодлого, чиг үүргийг хэрэгжүүлэхдээ Зам, тээврийн хөгжлийн Сайдтай бүтээгдэхүүн нийлүүлэх гэрээ байгуулж, яамны үйл ажиллагааны төлөвлөгөөтэй уялдсан "төв"-ийн үйл ажиллагааны төлөвлөгөөг батлуулан ажиллах;

4.1.4. Орон нутагт автотээврийн ажил үйлчилгээг хариуцан гүйцэтгэхдээ тухайн аймгийн Засаг даргатай гэрээ байгуулан, гэрээний хэрэгжилтийг хангах;

4.1.5. Орон нутаг дахь салбарын үйл ажиллагааг мэргэжил, арга зүйн удирдлагаар хангах, дэмжлэг үзүүлэх, ажлын уялдаа холбоог хангах;

4.1.6. Автотээврийн салбарын мэргэжлийн хүний нөөцийг бүрдүүлэн ажиллах; тэдний чадавхийг сайжруулах чиглэлээр шаардлагатай сургалтад хамруулах, дэмжлэг үзүүлэх, туршлага судлуулах ажлыг зохион байгуулах, ажлын гүйцэтгэлд хяналт тавих;

4.1.7. Орон нутагт ажиллах инженер, техникийн ажилтнууд болон мэргэжилтэй ажилтны хүний нөөцийн хэрэгцээг судлах, тодорхойлох, бүрдүүлэх;


4.1.8. Улс, хот хоорондын болон аймаг, орон нутгийн ачаа, зорчигч тээврийн ажил үйлчилгээнд тавих төрийн хяналтыг тус яамтай байгуулсан "Автотээврийн хяналтыг хамтран хэрэгжүүлэх" гэрээний дагуу хэрэгжүүлж, хяналтын байцаагчдыг ажиллах нөхцөл бололцоо /ажлын хувцас, техник хэрэгсэл/-гоор хангах "Нийтлэг журам батлах тухай" Засгийн газрын 2011 оны 311 дүгээр тогтоолын дагуу дотоодын хяналт шалгалтын журам боловсруулж, мөрдөх;

4.1.9. Засгийн газрын 2012 оны 146 дугаар тогтоолоор батлагдсан "Замын хөдөлгөөний аюулгүй байдлыг хангах үндэсний стратеги" /2012-2020/-г хэрэгжүүлэх төлөвлөгөө болон хөдөлгөөний аюулгүй байдлыг хангах чиглэлээр өөрийн эрхэлсэн ажлын хүрээ, харьяа нутаг, дэвсгэрийн хэмжээнд холбогдох ажлыг зохион байгуулан ажиллах, хэрэгжилтийг 6, 12 дугаар сарын 15-ны дотор багтааж замын хөдөлгөөний аюулгүй байдлыг хангах Үндэсний хороонд хүргүүлэх;

4.1.10. Улс, хот хоорондын болон аймаг, орон нутгийн ачаа, зорчигч, жуулчин, шуудан тээвэрлэлт, тээврийн хэрэгслийн техникийн хяналт, тээврийн хэрэгслийн бүртгэл, мэргэшсэн жолоочийн сургалт, шалгалт, үнэмлэх олголтын статистик тайлан мэдээлэл болон тээвэрлэлтийн ажил, үйлчилгээний орлого, зардлыг багтаасан санхүүгийн тайлан балансын мэдээллийг нэгтгэн яаманд улирал, хагас, бүтэн жилээр гаргаж тайлагнах;

4.1.11. Харьяа салбар, төвүүд болон тээвэрлэгч аж ахуйн нэгжүүдийг тээвэрлэлтийн үйл ажиллагааны программ хангамжийн нэгдсэн сүлжээнд холбох;

4.1.12. Иргэдэд тээврийн үйлчилгээг ойртуулах, зорчигчдын аюулгүй байдлыг хангах үүднээс зорчигчийн ачаа тээшийг хянах төхөөрөмж, тээшний хэмжээг тогтоох жин хэмжүүр, тээш хадгалах зориулалтын байрыг бий болгох, тээшний тасалбар олгох, тогтоосон хэмжээнээс илүү гарсан ачааг илгээмжээр



хүргэх үйлчилгээний төрлийг бий болгож, олон улсын жишигт нийцүүлсэн үйлчилгээг зохион байгуулах;

4.1.13. Монгол Улсын Засгийн газар, БНХАУ-ын Засгийн газар хоорондын Автотээврийн хэлэлцээр, автотээврийн төлөөлөгчдийн ээлжит уулзалтын протоколыг хэрэгжүүлэх ажлыг зохион байгуулах, үр дүнг улирал тутам танилцуулах;

4.1.14. Жил бүрийн зорилтот түвшинд зураг төсөл нь бэлэн болсон аймгийн төв, томоохон суурин газарт техникийн хяналтын үзлэгийн төвийн барилгыг тусган үе шаттай барих;

4.1.15. Орон нутгийн засаг захиргаатай хамтран нийтийн зорчигч тээврийн автобуудал, авто зам дагуух үйлчилгээний цогцолборын барилга байгууламжийг хувийн хэвшлийн хөрөнгөөр барих ажлыг зохион байгуулах;

4.1.16. Автотээврийн хэрэгслийн бүртгэл хөтлөх, мэдээллийн нэгдсэн сан хөтлөх, мэргэшсэн жолоочийн шалгалт авах, үнэмлэх олгох, автотээврийн хэрэгсэлд техникийн хяналтын үзлэг хийх, авто үйлчилгээний байгууллагад ангилал тогтоох ажлыг холбогдох журамд заасны дагуу зохион байгуулах;

4.1.17. Гэрээний үндсэн дээр хариуцуулан гүйцэтгэх ажил үйлчилгээг шуурхай зохион байгуулах нөхцөл боломжийг хангуулах зорилгоор бусад холбогдох эрх зүйн акттай уялдуулж дүрэм, журам, стандартыг шинээр боловсруулах, шинэчлэн сайжруулах чиглэлээр санал хүсэлт гаргах, холбогдох дээд шатны байгууллагаар шийдвэрлүүлэх;

4.1.18. Автотээврийн салбарын үйл ажиллагааны үндсэн үзүүлэлтийг оновчтой үнэн зөв байлгах талаар Үндэсний статистикийн газар болон холбогдох бусад байгууллагуудтай хамтран ажиллаж мэдээллийн үнэн зөв байдлыг хангах.

4.1.19. Зам, тээврийн хөгжлийн яамнаас шилжүүлж буй зарим чиг үүрэг, эрхийг бусад этгээдэд шилжүүлэхийг хориглоно.

#### **Тав. Талуудын хүлээх хариуцлага**

5.1. Талууд энэхүү гэрээ болон Монгол Улсын хууль тогтоомжийг зөрчсөн тохиолдолд холбогдох хуулийн дагуу хариуцлага хүлээнэ.

#### **Зургаа. Маргаан шийдвэрлэх тухай**


6.1. Энэхүү гэрээтэй холбоотой аливаа маргаан гарсан тохиолдолд талууд хэлэлцээрийн зарчмаар тохиролцоонд хүрэхийг эрмэлзэнэ.

6.2. Дээрх заалтад заасны дагуу тохиролцоонд хүрч чадаагүй тохиолдолд Монгол Улсын хуулийн дагуу шүүхээр шийдвэрлүүлнэ.

#### **Долоо. Бусад зүйл**

7.1. Гэрээг 2 хувь үйлдэж, талууд тус бүр нэг хувийг хадгална.

7.2. Хоёр тал бичгээр санал тавьж, харилцан зөвшилцөн энэхүү гэрээнд нэмэлт, өөрчлөлт оруулж болно.




7.3. Гэрээний нэмэлт, өөрчлөлтийг тухай бүрд нь бичгээр үйлдэн Төрийн нарийн бичгийн дарга, төвийн захирал нар гарын үсэг зурж, гэрээний эх хувьд хавсаргана.

7.4. Гэрээний аль нэг зүйл, заалт хүчингүй болсон нь гэрээний бусад зүйл, заалтыг биелүүлэхэд саад болохгүй.

7.5. "Төв" нь гэрээний биелэлтийг хагас, бүтэн жилээр гаргаж тайлагнах бөгөөд дараа оны гэрээ байгуулахаас өмнө гэрээгээр хүлээсэн үүргээ хэрхэн биелүүлсэн талаар яам дүгнэлт гаргаж гэрээг сунгах эсэх асуудлыг шийдвэрлэнэ.


ГЭРЭЭ БАЙГУУЛСАН:

ЗАМ, ТЭЭВРИЙН ХӨГЖЛИЙН ЯАМНЫ  
ТӨРИЙН НАРИЙН БИЧГИЙН ДАРГА



Ж.БАТ-ЭРДЭНЭ

"АВТОТЭЭВРИЙН ҮНДЭСНИЙ ТӨВ"  
ТӨҮГ-ЫН ЗАХИРАЛ



П.ДЭЛГЭРНАРАН

УХ/10190/0324165

МОНГОЛ УЛСЫН  
ЗАМ, ТЭЭВРИЙН ХӨГЖЛИЙН ЯАМ  
СХ ХУБЬ

Сийд тусгай бичгийн дарга  
дугаар гэрээ

2016 02

